

**ИРГЭНИЙ НИСЭХИЙН САЛБАРТ ХАМТРАН АЖИЛЛАХ ТУХАЙ
МОНГОЛ УЛСЫН ЗАМ, ТЭЭВРИЙН ЯАМ БОЛОН
ОРОСЫН ХОЛБООНЫ УЛСЫН ТЭЭВРИЙН ЯАМ ХООРОНДЫН
ПРОТОКОЛ**

Монгол Улсын Зам, тээврийн яам болон Оросын Холбооны Улсын Тээврийн яам (цаашид “Талууд” гэх),

Монгол Улс болон Оросын Холбооны Улсын хоёр талт хамтын ажиллагааг харилцан ашигтай, түншлэлийн зарчим дээр үндэслэн бэхжүүлэхэд дэмжлэг үзүүлэх харилцан эрмэлзлийг удирдлага болгож,

агаарын тээврийн салбарын хамтын ажиллагааг цаашид идэвхжүүлэхэд чиглэсэн өөрсдийн хүсэл тэмүүллийг батлан илэрхийлж,

тээврийн дэд бүтцийг хөгжүүлэх төслийг хэрэгжүүлэх талаар хамтын ажиллагааг өргөжүүлэх ач холбогдлыг онцлон тэмдэглэж,

Монгол Улс болон Оросын Холбооны Улс хоорондын хамтын ажиллагааг хөгжүүлэх тухай гэрээг хэрэгжүүлэхэд болон иргэний нисэхийг хөгжүүлэх талаар цаашдын хамтын ажиллагааны чиглэл, хэлбэрийг тодорхойлоход өөрийн эрх хэмжээний хүрээнд оролцохыг эрмэлзэж,

дараахь зүйлийн талаар харилцан ойлголцолд хүрэв:

1. Талууд өөрийн улсын хууль тогтоомжид нийцүүлэн харилцан сонирхсон бүхий л чиглэлээр агаарын тээврийн салбарын хамтын ажиллагааг өргөжүүлэх, идэвхжүүлэхэд хүчин чармайлт гаргана.

2. Талууд дараахь чиглэлээр хамтын ажиллагааг хөгжүүлэхийг эрмэлзэнэ:

2.1. Монгол Улсын иргэний нисэхийн салбарын мэргэжлийн боловсон хүчнийг Оросын Холбооны Улсын иргэний нисэхийн боловсролын байгууллагад нөхөн төлөх (төлбөртэйгөөр) үндсэн дээр (нислэгийн, нислэгийн удирдагч, инженер техникийн ажилтан ба бусад) бэлтгэх, сургах, давтан сургах, мэргэжил дээшлүүлэх;

2.2. Нисэхийн эрэн хайх, авран туслах чиглэлд уялдаа холбоог хөгжүүлж, боловсронгуй болгох;

2.3. Монгол Улс агаарын хөлөг хоорондын босоо зайчлалын системд 2015 оноос шилжихээр төлөвлөж байгаатай холбогдуулан 1944 оны 12 дугаар сарын 7-ны өдөр Чикаго хотноо байгуулагдсан Олон улсын иргэний

нисэхийн конвенцийн 2 дугаар хавсралтын 3 дугаар нэмэлтийн а) хүснэгтийн дагуу Монгол Улсын нутаг дэвсгэрт агаарын хөлөг хоорондын зайчлалын дээрх системийг нэвтрүүлэх болон ашиглах;

2.4. Монгол Улсад ашиглагдаж буй ЗХУ болон ОХУ-д үйлдвэрлэсэн агаарын хөлгийн нислэгт тэнцэх чадварыг хадгалах асуудлаар хамтран ажиллах.

3. Талууд энэхүү хамтын ажиллагааны тухай протоколын заалтыг хэрэгжүүлэхтэй холбоотой тулгарч буй асуудлыг хэлэлцэж байх зорилгоор шинжээчдийн түвшинд ажлын уулзалтын хүрээнд хоёр талын хамтын ажиллагааг үргэлжлүүлэх сонирхолтой байгаагаа илэрхийлж байна.

4. Энэхүү хамтын ажиллагааны тухай протокол нь гарын үсэг зурсан өдрөөс хүчин төгөлдөр болно.

Улаанбаатар хотноо 2014 оны 9 дүгээр сарын ...-ны өдөр монгол, орос хэлээр хоёр эх хувь үйлдэв.

**МОНГОЛ УЛСЫН
ЗАМ, ТЭЭВРИЙН ЯАМЫГ ТӨЛӨӨЛЖ**



А. ГАНСҮХ

**ОРОСЫН ХОЛБООНЫ УЛСЫН
ТЭЭВРИЙН ЯАМЫГ ТӨЛӨӨЛЖ**



М.Ю.СОКОЛОВ